


28 IULIE
IRINA PIATIGORSKAIA

ACATISTUL
SF.CUVIOASE
IRINA
DE LA
HRISOVOLANT-
CONSTANTINOPOL



ACATISTIERUL PE IULIE-RU



Акафист святой преподобной Ирине, игумении Хрисоваланту

Кондак 1

Избранная агнице стада словеснаго Христова, юже призва от земнаго брака Жених Небесный, поем досточудная дела твоя, преподобная Ирино, и яко сподобльшися твоих благодеяний, со умилением зовем ти: **Р**адуйся, преподобная Ирино, наставнице наша богомудрая.

Икос 1

Ангел мирен, емуже вручи Господь душу твою от купели крещения, выну спребываше ти, святая мати, миром Христовым тя ограждая, во еже оправдितися в житии твоём имени твоему. Мы же, зряще, яко и дар миротворения обильно в тебе явился, приносим ти похвалы сия:

Радуйся, миру тезоименитая, мир Божий в сердце своем стяжавшая;

Радуйся, миром тем, превысшим всякаго ума, сердце свое и помышления в Господе соблюдавшая;

Радуйся, яко мира твоего ради тысящи вокруг тебе спасошася;

Радуйся, яко првда и мир в тебе облабызастася;

Радуйся, ненависть и злобу выну умиравшая;

Радуйся, уклонившихся на чуждые стези с Богом примирившая;

Радуйся, яко не любляше мира и яже в мире любви

ради Отчия;
 Радуйся, яко Бог мира сокруши сатану под ногама твоима;
 Радуйся, преподобная Ирино, наставнице наша богомудрая.

Кондак 2

Видящи Господь сердце твое, яко чисто бе и смиренно, воззва тя любовью Своею от пути пространного, да потщиши узким путем и тесными враты в Царствие Небесное внити. Темже от благодарного сердца возопила еси Господеви: Аллилуиа.

Икос 2

Разума небеснаго взыскала еси, преподобная Ирино, егда на брак царский уготованная ко святому Иоанникию путь свой управила еси. Он же, прозорливима очима Божие о тебе промышление зря, благослови тя на окормление овец Христовых, в обители Хрисоваланту подвизающихся. Благословение сие в сердце своем сложила еси, агнице Божия, и в ничтоже брак царский вменивши, во святую обитель притекла еси. Сего ради взываем ти:
 Радуйся, душу свою Небесному Жениху обручившая;
 Радуйся, суеты мирския отрешившаяся;
 Радуйся, царство земное в ничтоже вменившая;
 Радуйся, в Царствие Небесное узким путем взойти потщившаяся;
 Радуйся, имение свое нищим расточившая;
 Радуйся, сокровище нетленное на Небеси стяжавшая;

Радуйся, славы от людей не приемшая;
Радуйся, славы яже от единого Бога взыскавшая;
Радуйся, преподобная Ирино, наставнице наша
богомудрая.

Кондак 3

Силою свыше препояса тебе Господь, преподобная,
яко подвиг святого Арсения на себе восприяла еси,
ангельскому его стоянию пред Богом поревновавши.
Темже от заката до восхода солнца с простертыми к
востоку руками недвижно пребывала еси, воспевая
Богу: **А**ллилуиа.

Икос 3

Имущи в сердце своем залог блаженства вечного, с
любовию путем евангельских заповедей ко Господу
востекала еси. Пречудное же и блаженное твое житие
воспеваем сие:

Радуйся, нищету духовную возлюбившая;

Радуйся, слезами покаяния омывшаяся;

Радуйся, кротостию землю сердца своего
наследовавшая;

Радуйся, правдою небесною насыщенная;

Радуйся, милость у Бога обретшая;

Радуйся, чистаго твоего сердца ради, Господа
лицезревшая;

Радуйся, миротворением, яко чадо верное, Отцу
Небесному послужившая;

Радуйся, гонение от духов злобы за Христа
претерпевшая;

Радуйся, преподобная Ирино, наставнице наша богомудрая.

Кондак 4

Бурю помышлений, по зависти диавола на тебе воздвигнутую, якоже иногда преподобная Мария Египетская, утишила еси многодневным долулежанием, плачем горьким и воплем крепким ко Господу; егдаже благоволи Господь послати в помощь ти благодать Свою, прославила еси имя Его святое, возопивши: Аллилуиа.

Икос 4

Слышаще о делех твоих и подвизах, притекаху к тебе вси сущие в недоумениях и обстояниях, и всем милосердая помощница и благая советница явилася еси. Сего ради вопием ти:
Радуйся, граде, иже не может укрыться, яко наверху горы стояй;
Радуйся свеще, духом святым вожженная, воеже светити миру;
Радуйся, добрая земле, семя слова Божия взрастившая;
Радуйся, дела твоими Отца Небеснаго прославившая;
Радуйся, ближняго паче себе возлюбившая;
Радуйся, немощи бесильных понесшая;
Радуйся, в житейском море погружаемых спасающая;
Радуйся, обуреваемых к тихому пристанищу приводящая;
Радуйся, преподобная Ирино, наставнице наша богомудрая.

Кондак 5

Богоявленную звезду показа тя святыи патриарх Мефодий, егда хотящу бежати славы человеческия, возведе тя в сан игуменский, да просветятся мнози лучами высокия твоя святыни и да воспоют Богови: Аллилуиа.

Икос 5

Видя враг рода человека, яко не успе уловити тя, восхоте отторгнуть тя от молитвы, возжег на тебе одеяние твое. Ты же отнюд не подвиглася еси, зрящи Ангела пред тобою стояща и венец ти сплетающа. Сего ради вопием ти:
 Радуйся, прещений князя тьмы не убоявшаяся;
 Радуйся, молитвы ради огнь вещественный презревшая;
 Радуйся, яко огнь, иже Господь прииде вреци на землю, в сердце твоем разгорется;
 Радуйся, яко огнем любви Божественныя опаляема желала еси разрешитися от тела и с Господом быти;
 Радуйся, из пламене, яко отроцы из пещи Вавилонския, Богу хвалу возносившая;
 Радуйся, во страданиях Господа ради мучеником уподобившаяся;
 Радуйся, яко Ангел Господень предстояще ти и укрепляюще;
 Радуйся, яко целу тебе Господь, аки купину неопалимую, из пламене восстави;
 Радуйся, преподбная Ирино, наставнице наша богомудрая.

Кондак 6

Проповедница Евангелия Христова в век беззаконный явилася еси, преподобная Ирино, царей обличаючи, сущих в бедах избавляючи, всех с любовью увещаючи пети Богу: Аллилуиа.

Икос 6

Возсия в тебе свет ведения, егда внят Господь молению твоему, да откроет ти помышления людских сердец. Оттоле Ангел Божий выну тайная и неудобьпредвиденная сказоваше ти, и тако волю Божию о людех ведущи, многих спасла еси, вопиющих ти:

Радуйся, мати наша премудрая и прозорливая;
 Радуйся, помощнице наша добрая и милосердая;
 Радуйся, беззаконных обличающая;
 Радуйся, бесовские козни разрушающая;
 Радуйся, невинно осужденных оправдывающая;
 Радуйся, от клеветы изымающая;
 Радуйся, душевные недуги врачующая;
 Радуйся, верных о близости кончины упреждающая;
 Радуйся, преподобная Ирино, наставнице наша богомудрая.

Кондак 7

Хотящи Пресвятая Дева научити человеки, яко праведно есть святых призывать, посла к ти святого Василия Великого и святую мученицу Анастасию; ихже помощь от беды избавльшися со слезами возблагодарила еси Бога: Аллилуиа.

Икос 7

Новую благодать показа ти Господь, егда посла ти плоды из рая, ихже мореплавателю некоему апостол Иоанн близ острова Патмос вручи и отнести игумении Ирине во святую обитель Хрисоваланту повеле. Мы же, таковому Божию к ти благоволению дивящися, воспеваем ти:

Радуйся, Апостола любви дарами и словами утешения обрадованная;

Радуйся, райскую сладость на земли вкушившая;

Радуйся, святых отец каппадокийских преславная соотечественнице;

Радуйся, духовного тех отечества достойная наследнице;

Радуйся, Царицы Небесная смиренная собеседнице;

Радуйся, Небожителей благоговейная сотаиннице;

Радуйся, сущих на земли не оставляющая;

Радуйся, и нас в объятия семьи нашей Небесная внити вразумляющая;

Радуйся, преподобная Ирино, наставнице наша богомудрая.

Кондак 8

Странное чудо виде сестра твоя, егда изыде во едину от ночей во двор и узре тя в молитве на воздухе стоящу; деревья же два, яко жива, долу склонястася, вкупе с тобою хвалу возносяще Творцу всяческих: Аллилуиа.

Икос 8

«Вся тварь совокупно стенает и мучится, ожидающе усыновления», — вещает апостол; первозданного же твоего образа сияние зряще, все творение Божие покаяшася ти, милостивая мати, с любовью взывающи:

Радуйся, творение руку Божию возлюбившая;

Радуйся, с Небом и землею умирившаяся;

Радуйся, славы первообразная взыскавшая;

Радуйся, аки Адам в саду Едемstem, всею тварию повелевавшая;

Радуйся, домостроения Божия тайнозрительнице;

Радуйся, Небеснаго Господина верная домоправительнице;

Радуйся, талант свой многожды умноженный Господу принесшая;

Радуйся, вшедшая в радость Господа своего;

Радуйся, преподобная Ирино, наставнице наша богомудрая.

Кондак 9

Вси небожителие удивишася, егда явися ти Господь со Ангели во храме и воззва единый от Ангел к Богу, вопрошая о времени прославления твоего. Тогда возвести Господь в таинственных словесех знамения времен, в няже обитель Хрисоваланту паки возведена будет и прославится на земли имя твое. По сем же Ангели вси едиными усты возопиша Богу: Аллилуиа.

Икос 9

Ветии многовещаннии не возмогут изрещи славы, еяже сподоби тебе Господь по неложному обетованию Своему: «Ихже око не виде, и ухо не слыша, и на сердце человеку не взыдоша, яже уготова Господь любящим Его». Мы же, аще и недостойни есми, дерзаем возгласити ти песенные сия хвалы: Радуйся, житием своим Богу угодившая; Радуйся, в дому Отца Небеснаго обитель себе сотворившая; Радуйся, славы незаходимыя сподобившаяся; Радуйся, земных и небесных радование; Радуйся, сосуде Божий избранный; Радуйся, христианскаго рода украшение; Радуйся, вместилище благодати Божия; Радуйся, Церкви Православныя похвало; Радуйся, преподобная Ирино, наставнице наша богомудрая.

Кондак 10

Спасения надежда несумненная возвесели сердце твое, егда возвести ти Дух Святый день кончины твоея, глаголя: «Ведай, яко на будущее лето в сие время воспоеши со Ангели новую песнь пред престолом Бога Отца». Ты же, слышащи сие, с трепетом и благоговением воспела Богу: Аллилуиа.

Икос 10

Стена неборимая противу древняго змия явилася еси, святая мати, небоязненно на аспида и василиска наступивши и житие свое добропобедно совершивши.

Темже пред кончиною твоею просветися лице твое,
аки солнце, да узрят вернии и да укрепят сердца
своя, воспевая ти:

Радуйся, смиренномудрием духа гордыни
низложившая;

Радуйся, течение твое добре совершившая;

Радуйся, подвижнице, подвигом добрым
подвизавшаяся;

Радуйся, венец от Господа приявшая;

Радуйся, горький час кончины в радость
преложившая;

Радуйся, яко дуси злобы не смеша приблизитися ти;

Радуйся ко престолу Божию невозбранно
вознесшаяся;

Радуйся, яко выну зриши Господа доброту
неизреченную;

Радуйся, преподобная Ирино, наставнице наша
богомудрая.

Кондак 11

Пети и ублажати тя достойно есть, преподобная
Ирино, многими бо подвиги Богу угодила еси,
наипаче же молитвою и смирением; и тако цели
христианския жизни достигла еси, ДухаСвятаго
стяжавши и тем глаголя в сердце своем: **А**ллилуиа.

Икос 11

Свет Божественный, исшедши от лика твоего, порази
слепотою беззаконнаго императора, якоже иногда
Савла на пути в Дамаск, дондеже принесе Богу
покаяние, в сокрушении сердца взывая ти:

Радуйся, яко во оружие света облеклася еси;
 Радуйся, яко просветися свет твой пред человеки;
 Радуйся, молитвы неугасимое горение;
 Радуйся, сердец наших, охладевших в суете,
 согреение;
 Радуйся, сияние любви нелицемерныя;
 Радуйся, яко положи тебе Господь во свет заблудшим;
 Радуйся, познанием Славы Божия в лице Христа
 Иисуса озаренная;
 Радуйся, к наследию святых во свете Христовом
 призванная;
 Радуйся, преподобная Ирино, наставнице наша
 богомудрая.

Кондак 12

Благодать Божия осени афонскаго инока Нектария,
 егда уразуме волю Господню, да напишет икону твою.
 Дело сие богоугодное совершив, славный иконописец
 в Смирну путь свой управи, и тамо мученическую
 кончину от неверных прият, Богу вопия: Аллилуиа.

Икос 12

Поюще твое прославление, от всех концов земли
 притекают людие во храм, в честь твою
 воздвигнутый, емуже место сама верным в сонном
 видении указала еси; темже и мы со умилением
 глаголем ти:
 Радуйся, икону нам свою святую даровавшая;
 Радуйся, яко от нея мнозии чудеса деются;
 Радуйся, новыя обители Хрисоваланту незримая
 покровительнице;

Радуйся, яко по всем концем земли людям являешия;
 Радуйся, яко во славу Божию благодатную помощь им
 подаеши;
 Радуйся, яко чудо твое о райских яблочех верными
 чтится;
 Радуйся, яко в воспоминание чуда сего и ныне
 яблочки освящаются;
 Радуйся, яко от плодов тех недужнии благодатию
 Божию исцеляются;
 Радуйся, преподобная Ирино, наставнице наша
 богомудрая.

Кондак 13

О преблаженная и всякия чести достойная,
 преподобная мати наша Ирино! Прими малое сие
 моление наше и яко имущи дерзновение пред
 Господом, изми от вечныя смерти всех вопиющих о
 тебе к Богу: Аллилуиа.

[С разрешения автора выкладываю в «Уставные
 заметки» акафист преподобной Ирине, игумении
 обители, именуемой «Золотой кошель» (Χρυσοβαλάντος),
составленный Ириной Пятигорской (Лондон,
 Великобритания). Текст публикуется по авторской
 машинописи, выверенной Людмилой Павловной
 Медведевой (Москва); цензурными инстанциями
 текст пока не рассматривался. В акафисте две
 молитвы, первая — на церковнославянском языке,
 вторая — на русском языке]